

A **lingua ojibwa** ou **anishinaabemowin** (ᐱᓂᓂᓐᓄᓐᓂᓐᓄᓐ no silábico do ojibwa oriental) é o segundo máis falado dos idiomas ameríndios no Canadá (tralo cree), e o terceiro máis falado en norteamérica (tralo navajo e o cree).^[1] Fálano os anishinaabe: un grupo composto dos algonquinos, os nipissing, os ojibwa, os saulteaux, os mississauga, e os ottawa. Unha lingua moi estreitamente relacionada, e frecuentemente incluída nese grupo, son o idioma anishininimowin e o idioma potawatomi. Debido ao seu papel de grande importancia no comercio de pel cos franceses, a lingua anishinaabe converteuse no idioma de comercio na rexión ao redor dos Grandes Lagos, e por centos de anos tivo unha presenza moi importante no norte dos Estados Unidos e no Canadá.

Clasificación

Distribución xeográfica

Dialectos

Hai varios dialectos do ojibwa bastante diverxentes. Os máis importantes son:

- Nipissing e algonquino (*anicinàbemowin/omàmiwininimowin*)
- Ojibwa llaneño (saulteaux/bungee) (*anishīnāpēmowin/lnakawēmowin*)
- Ojibwa oriental (mississaugas)
- Ojibwa setentrional (ojibwa do noroeste/saulteaux de Ontario)
- Odaawaa (ottawa) (*nishnaabemwin/jibwemwin/daawaa*)
- Ojibwa severn (oji-cree/ojibwe setentrional) (*anishiniimowin*), e
- Ojibwa do suroeste (chippewa/chipeva) (*anishinaabemowin/ojibwemowin*).

Algúns opinan que o algonquino non é un dialecto do grupo ojibwa, senón unha lingua distinta que está moi estreitamente relacionada ao mesmo, pero outros din que si é un dialecto do anishinaabemowin. Igualmente, algúns din que o potawatomi é un dialecto do anishinaabemowin aínda que outros din que é unha lingua distinta.

Fonoloxía

As linguas do grupo ojibwa en xeral teñen 18 consoantes. As obstruintes teñen un contraste que a miúdo se chama "lenis/fortis", no que os obstruintes escritos como consoantes xordas pronúncianse máis fortes, máis longas de duración, e frecuentemente con aspiración ou preaspiración, mentres que eses escritos coma consoantes sonoras pronúncianse menos fortes, e máis curtos de duración. Con todo, en moitas comunidades a distinción converteuse nunha de consoantes xordas e sonoras.

Hai tres vogais breves, /i a o/, e tres vogais longas correspondentes, /iː aː oː/, e ademais unha cuarta vogal longa que non ten unha vogal curta correspondente, /eː/. As vogais breves tamén son distintas das vogais longas con respecto á calidade, e fonéticamente están máis preto de [ɪ], [ə]~[ʌ], e [o]~[ʊ]. Moitos falantes pronuncian /oː/ coma [uː], e tamén moitos pronuncian /eː/ coma [ɛː]. Ademais, hai vogais nasais, pero son bastante infrecuentes.

En canto ao acento, o idioma ojibwa divide as palabras en "pés metricais", e cada pé ten unha sílaba "forte" e (se dura dúas sílabas) unha sílaba "débil." Tódalas sílabas fortes reciben polo menos tensión secundaria. En xeral, a sílaba forte que hai no terceiro pé desde o final dunha palabra recibe a tensión principal. En moitos dialectos, vogais que non teñen tensións a miúdo pérdense, ou cambian de calidade.

Gramática

Como moitos idiomas indíxenas, o idioma anishinaabe é polisintético, o que significa que ten moita síntese e un gran cantidade de morfemas nunha soa palabra. É unha lingua aglutinante, así que constrúe as súas palabras engadindo morfema tras morfema, no canto de ter poucos afixos, cada un dos cales que leva moita información.

Hai unha distinción entre dous tipos da terceira persoa, o "próximo" (a terceira persoa dunha oración que se supón que sexa a máis importante ou enfocada), e o "obviativo" (a terceira persoa que se supón que sexa menos importante ou enfocada). O nome pode ser singular ou plural, e hai dous xéneros, animado ou non animado. Existen distintos pronomes persoais, pero como en español ou galego, normalmente úsase só por énfase. Os pronomes distinguen entre a primeira persoa do plural inclusiva e exclusiva.

A categoría de palabras máis complicada son os verbos. Os verbos declínanse pola súa *orde* (o *indicativo*; o *conxuntivo*, similar ao subxuntivo en español, e que soamente se usa en oracións subordinadas; e o *imperativo*), por *polaridade* (negativo ou afirmativo), e pola persoa, número, animación, e posición de aproximado/obviativo tanto do seu suxeito como do seu obxecto, e tamén por algúns *modos* diferentes (que inclúen o *dubitativo* e *pretérito*) e tempos.

Vocabulario

Aínda que hai algunhas palabras no idioma ojibwa que veñen do inglés (*gaapii*, "café", de *coffee*; *maam(aa)*, "nai", de *mom*) e do francés (*naapaane*, "a fariña", de *la farine*; *ni-tii*, "o té", de *le thé*), en xeral, a lingua é notable pola súa falta de palabras de orixe estranxeira. No seu lugar, os falantes prefiren crear palabras para novos conceptos usando vocabulario que xa existe. Por exemplo, en *ojibwemowin*, "avión" é *bemisemagak*, literalmente "cousa que voa" (de *bimisemagad*, "voar"), e "pila" dise *ishkode-makakoons*, literalmente "caixiña de fogo" (de *ishkode*, "fogo", e *makak*, "caixa"). Ata "café" chámase *makade-mashkikiwaaboo* ("medicina de líquido negro") por moitos falantes, en lugar de *gaapii*.

Escrituras

Escríbese *ojibwemowin* usando un silabario, que foi inventado probablemente polo misioneiro James Evans ao redor de 1840 e que el baseou na Taquigrafía Pitman. Nos EE. UU. a lingua normalmente escríbese fonéticamente con caracteres latinos. O silabario xeralmente úsase no Canadá. O alfabeto máis novo que usa caracteres latinos é o "Sistema de Vogais Dobres" concibido por Charles Fero. Aínda que polo de agora non hai unha ortografía estándar, o Sistema de Vogais Dobres vólvese máis e máis popular entre educadores dos EE. UU. e Canadá, debido ao seu fácil manexo.

Sistema de vogais dobres

O sistema de vogais dobres consiste en tres vogais breves, catro vogais longas, 18 consoantes e un nasal, representadas cos seguintes caracteres

a aa b ch d e g ' h i i j k m n ny o oo p s sh t w y z zh

Este sistema chámase o sistema de "Vogais Dobres" porque as vogais longas que corresponden ás vogais breves <a>, <i> y <o> escríbense dobres: <aa>, <ii> e <oo>. Neste sistema, escríbese a nasal "ny" como "nh" se termina a palabra. Os grupos consoánticos permitidos son <mb>, <nd>, <ng>, <n'>, <nj>, <nz>, <ns>, <nzh>, <sk>, <shp> e <shk>.

Exemplos

Este texto en *ojibwemowin* tómase con permiso das primeiras catro liñas de Niizh Ikwewag (https://web.archive.org/web/20080704074256/http://cal.bemidjistate.edu/english/donovan/Two_Women.html), un conto escrito orixinalmente por Earl Nyholm, na páxina web do profesor Brian Donovan da Universidade Estatal de Bemidji (Minnesota):

Texto

- 1. *Aabiding gii-ayaawag niizh ikwewag: mindimooyenh, odaanisan bezhig.*
- 2. *Iwidi Chi-achaabaaning akeyaa gii-onjibaawag.*
- 3. *Inashke naa mewinzha gii-aawan, mii eta go imaa sa wiigiwaaming gaa-taawaad igo.*
- 4. *Mii dash iwapii, aabiding igo gii-awi-bagida'waawaad, giigoonyan wii-amwaawaad.*

Tradución

- 1. Unha vez, había dúas mulleres: unha vella, e unha das súas fillas.
- 2. Eran de alá, cara a Inger.
- 3. Bo, ves, facía moito tempo; elas soamente vivían alá nun wigwam.
- 4. E entón, alá naquel tempo, unha vez pescaron; pensaban comer peixe.

Glosa

Aabiding	gii-ayaawag			niizh	ikwewag:		mindimooyenh,	odaanisan			bezhig.
aabiding	gii-	ayaa	-wag	niizh	ikwe	-wag	mindimooyenh,	o-	daanis	-an	bezhig.
unha vez	PAS-	estar nun lugar	-3PL	dous	muller	-PL	vella,	3SG.POS-	filla	-OBV	unha.
Unha vez	estaban nun lugar			dúas	mulleres:		vella,	súa filla			unha.

Iwidi	Chi-achaabaaning			akeyaa	gii-onjibaawag.		
iwidi	chi-	achaabaan	-ing	akeyaa	gii-	onjibaa	-wag.
alá	grande-	corda de arco	-LOC	por alá	PAS-	vir de	-3PL.
Alá	en Inger (lit: no [o río da] Corda de Arco Grande)			por alá	de alá víñan.		

Inashke	naa	mewinzha	gii-aawan,		mii eta go			imaa	sa	wiigiwaaming		gaa-taawaad			igo.
inashke	naa	mewinzha	gii-	aawan	mii	eta	go	imaa	sa	wiigiwaam	-ing	gaa-	daa	-waad	igo.
ves	entón	fai moito tempo	PAS-	haber	así	soamente	ENF	aí	ENF	wigwam	-LOC	PAS.CONJ-	vivir	-3PL.CONJ	ENF.
Ves	entón	fai moito tempo	era que,		soamente			aí	así	nun wigwam		que viviran			naquel entón.

Mii dash		iwapii,		aabiding	igo	gii-awi-bagida'waawaad,				giigoonyan		wii-amwaawaad.		
mii	dash	iw-	-apii	aabiding	igo	gii-	awi-	bagida'waa	-waad,	giigoonh	-yan	wii-	amw	-aawaad.
é que	CONTR	eso-	-logo	unha vez	ENF	PAS-	ir e-	pescar cunha rede	-3PL.CONJ	peixe	-OBV	DESD-	comer	-3PL/OBV.CONJ
E entón		logo,		unha vez	naquel entón	que foran e pescaran cunha rede				eses peixes		que elas vaian a comelos		

Abreviaturas:

3	terceira persoa
SG	singular
PL	plural
PAS	Pretérito imperfecto
POS	posesivo
OBV	obviativo
LOC	locativo
ENF	partícula enfática
CONJ	orde modo subxuntivo
CONTR	contraste
FUT	futuro
DESD	desiderativo

Notas

1. Ou o cuarto, diferentes fontes non están de acordo.

Véxase tamén

Bibliografía

- Mithun, Marianne. 1999. *The Languages of Native North America*. Cambridge: University Press.
- Nichols, John D. and Earl Nyholm. 1995. *A Concise Dictionary of Minnesota Ojibwe*. Minneapolis: University of Minnesota Press.
- Picard, Marc. 1984. *On the Naturalness of Algonquian 1*. International Journal of American Linguistics 50:424-37.
- Rhodes, Richard A. 1985. *Eastern Ojibwa-Chippewa-Ottawa Dictionary*. Berlin: Mouton de Gruyter.
- Valentine, J. Randolph. 2001. *Nishnaabemwin Reference Grammar*. Toronto: University of Toronto Press.



Vexa a proba da Wikipedia en **Lingua ojibwa** (<https://incubator.wikimedia.org/wiki/Wp/ojb>)

Ligazóns externas

- (en español) **Linguas do Mundo: Lingua Ojibwa** (<http://www.proel.org/mundo/ojibwa.htm>)
- (en inglés) **Sociedade do idioma ojibwe** (<http://www.ojibwemowin.com/>)
 - (en inglés) **OLS miinawaa** (<http://groups.yahoo.com/group/ojibwelanguagesocietymiinawaa/>) — extensión da Sociedade do Idioma Ojibwe
- (en inglés) **Unha introdución de ojibwe** (<http://imp.lss.wisc.edu/~jrvalent/ais301/index.html>) por Rand Valentine
- (en inglés) **Gramática, leccións e dicionarios** (<http://www.first-ojibwe.net/translations/weshki-ayaad/index.html>)
- (en inglés) **Dicionario ojibwe/inglés en Freelang** (<http://www.freelang.net/dictionary/ojibwe.html>) — Dicionario freeware para cargar, que está actualizado con novas palabras cada 6-10 semanas
- (en inglés) **Informe sobre ojibwe para o Museo de Linguas** (<http://www.language-museum.com/o/ojibwa.htm>)
- (en inglés) **Linguas indíxenas do Canadá** (https://web.archive.org/web/20070404183743/http://www.fp.ucalgary.ca/howed/abor_lang.htm) — Con datos sobre o número de falantes
- (en inglés) **A páxina sobre ojibwe en Friki-de-Linguas** (<http://www.languagegeek.com/algon/ojibway/anishinaabemowin.html>) — Nesta páxina tamén teñen fontes do silabario e teclados
- (en inglés) **Topónimos de ojibwe** (<https://web.archive.org/web/20080907210109/http://cal.bemidjistate.edu/english/donovan/placenames.html>)
- (en inglés) **Nosos idiomas: nakawē** (<https://web.archive.org/web/20051230141427/http://www.sicc.sk.ca/heritage/sils/ourlanguages/saulteaux/saulteaux.html>) (Centro Cultural dos Indios de Saskatchewan)
- (en inglés) **Niizh ikwewag** (https://web.archive.org/web/20080704074256/http://cal.bemidjistate.edu/english/donovan/Two_Women.html) — Un conto en ojibwe, orixinalmente contado por Earl Nyholm, profesor emérito de ojibwe da Universidade do Estado de Bemidji.
- (en inglés) **Informe sobre ojibwe para Ethnologue** (http://www.ethnologue.com/show_family.asp?subid=91082)
- (en inglés) **Linguas indíxenas: Un documento de apoio para o ensino dos deseños de idiomas, ojibwe e cree** (<http://www.edu.gov.on.ca/eng/document/curricul/ojibwe.pdf>)
- (en inglés) **O rexistro de Linguasphere. Edición de 1999 / 2000** (<https://web.archive.org/web/20080228054105/http://www.linguasphere.net/secure/up/pdf/zones/62.pdf>). Sector álgico.

A última edición desta páxina foi o 21 de xuño de 2020 ás 19:55.

Todo o texto está dispoñible baixo a licenza Creative Commons recoñecemento compartir igual 3.0; pódense aplicar termos adicionais. Consulte os [termos de uso](#) para obter máis información.

Wikipedia® é unha marca rexistrada da [Wikimedia Foundation, Inc.](#), unha organización sen fins lucrativos.